


Nanhī-sī Bher



nanhī-sī bheṛ

The Lost Lamb

by Bakhtullah

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a modified version
of an illus. by Rachael Coate

<https://freebibleimages.org/illustrations/btbm-psalm-23/>.

Bible quotations are from UGV.

for enquiries or to request more copies:

askandanswer786@gmail.com

Fahrist

| | |
|--|-----------|
| Ham Sab Khoī Huī Bheṛeñ Haiñ | 4 |
| Mere Nek Kām Mujhe Bachā Nahīñ Sakte | 6 |
| Koī Bhī Merī Sifārish Nahīñ Kar Saktā | 7 |
| Wāhid Hal: Achchhā Charwāhā | 9 |
| Injīl, Lūqā 15:4-7 | 13 |

Pahāron meñ ek charwāhā bastā thā. Uskī sau bheṛeñ thīñ. Rozānā wuh unheñ kabhī idhar kabhī udhar hāñkkar le jātā. Wuh māhir gallābān thā. Use mālūm thā ki achchhī charāgāh kahāñ hai, sāf-shaffāf pānī kahāñ kahāñ zamīn meñ se ubaltā hai. Koī janglī jāñwar un par jhapatṭā mārṭā to wuh use apnī lāṭhī aur ḡhulel se bhagātā. Use koī ḍar nahīñ thā, aur wuh har ek bheṛ kī fikr kartā thā.

Bheṛ ḡhud to apnī hifāzat nahīñ kar saktī. Wuh bahut sādī aur kamzor jāñwar hotī hai. Na wuh ḡhud achchhī charāgāh kī talāsh kar saktī hai na pānī kī. Janglī jāñwar us par wār kare to kāī bār wuh usī waqt ḍar ke māre dam toṛṭī hai.

Ek din charwāhā bheṛon ko bāre se nikālkar ek achchhī-ḡhāsī charāgāh kī taraf le gayā. Sūraj

chamak rahā thā, chiṛiyān chahchahā rahī thīn. Har taraf harī-bharī ghās aur rangārang phūl hawā meñ lahlahā rahe the. Bheṛeñ charte charte chaltī gaīn. Charwāhā jāntā thā ki jānwaroñ ko zyādā der tak ek jagah charānā nahīn chāhie. Un ko ghumānā bahut zarūrī hai tāki wuh ghās ko katar katarkar ḡhatm na karen.

Bheṛeñ mazā le lekar charwāhe ke pīchhe chaltī rahīn. Tab rāste kā ek moṛ āyā. Achānak ek nanhī-sī bheṛ ne dekhā ki rāste se kuchh haṭkar harī harī ghās chamak rahī hai. Wuh ḡhushī se phudaktī huī us taraf lapkī. Ghās kitnī ḡhushbūdār aur rasīlī thī! Dūsri bheṛeñ charwāhe ke pīchhe pīchhe āge niklīn. Nanhī bheṛ ko patā hī na chalā, wuh itnī mastī meñ thī.

Ṭhāh! Achānak wuh phisalkar dharām se ek gaṛhe meñ gir gaī. Be-chārī bheṛ! Ab use mālūm huā ki charwāhā kyoñ is taraf nahīn ātā. “Madad, madad!” Wuh mimiyātī mimiyātī thak gaī. Befāydā. Dūsri bheṛeñ kab kī ojhal ho gaī thīn. Bār

bār nanhī-sī bheṛ ne gaṛhe se nikalne kī koshish kī, lekin gaṛhā gahrā thā. Sāth sāth uskī ek ṭāng ko choṭ lag gaī thī. Chhalāng lagā lagākar wuh ākhirkār wāpas phisalkar paṛī rahī.

Ab wuh kyā kare? Shām ke sāy lañbe hote gae. Dūr dūr siyāron kī haulnāk āwāzeñ gūñj uṭhīñ. Nanhī bheṛ ghabrā gaī. Āhistā āhistā un kā shor qarīb hotā gayā. Nanhī bheṛ kā dil zor se ḍhak ḍhak karne lagā. Ab kyā karūñ, kyā karūñ? Kyā yih merā anjām hai?

Tab ek siyār kī chamaktī āñkheñ gaṛhe ke muñh par nazar āīñ. Bheṛ kā roāñ roāñ khaṛā ho gayā. Be-chārī chupke se kāñpte hue zamīn se chipak gaī. Ab kyā hogā? Ab yih mujh par jhapaṭ pareñge, mujhe boṭī boṭī kareñge.

Lekin yakāyak siyāron kī hañsī chīkhoñ meñ badal gaī. Koī unheñ bhagā rahā thā. Un kī āwāzeñ chīkhtī chīkhtī dūr hotī gaīñ.

Kyā huā thā? Kyā kisī rīchh yā sher ne unheñ bhagā diyā thā? Nanhī-sī bheṛ ko ūpar dekhne kī jurrat bhī na thī.

Achānak wuh chaunk paṛā. Ek narm aur mulāym āwāz gaṛhe ke kināre se sunāī dī. Ek āwāz jo wuh ḳhūb jāntī thī. Charwāhe kī āwāz. “Are, tū kahāñ jā girī hai?” Ek tāqatwar bāzū ne use uṭhākar apnī chhātī ke sāth lagā liyā.

Nanhī bheṛ ke dil kī tez dhaṛkan ekdam shānt ho gai. Ṭhos sīne ke sāth lage ab kyā fikr rah saktī thī? Us ne sukūn kī sāns lī. Charwāhā mazbūt qadam uṭhāte hue ghar wāpas chalā gayā.

Ḳhudāwand Īsā Masīh ne yih qissā sunāyā (Injil, Lūqā 15:4-7).

► *Is se wuh kyā batānā chāhtā thā?*

Pahlī bāt,

Ham Sab Khoī Huī Bheṛeñ Haiñ

Injil Sharīf meñ kaī bār likhā hai ki Ḳhudāwand Īsā ko logoñ par baṛā taras ātā thā,

Kyōnki wuh pise hue aur be-bas the, aisi bheṛoṅ kī tarah jin kā charwāhā na ho (Mattī 9:36).

Jab charwāhā na ho to bheṛ be-bas hotī hai. Na wuh apnī hifāzat kar saktī, na ṭhīk tarah kī ḳhurāk aur pānī pā saktī hai. Apne irdgird dekh lo. Har taraf khoī huī bheṛeṅ nazar ātī haiṅ. Be-shak wuh paise kamāte, shādī karte-karāte, duniyā kā tamāshā dekhte rahte haiṅ.

► *Lekin kyā un meṅ wuh tar-o-tāzagī hai jo sirf achchhā charwāhā dilā saktā hai? Kyā un ko yih pakkā ehsās hai ki Ḳhudā ne mujhe maṅzūr kar liyā hai? Kyā unheṅ wuh tasallī aur shānti hāsil hai jo sirf maṅzūr hone se paidā hotī hai?*

Nahīṅ.

► *To yih pakkā yaqīn, yih tasallī kis chīz se mil saktī hai? Ham kis tarah jān sakte haiṅ ki ham maṅzūr haiṅ? Ki Ḳhudā ne hameṅ qabūl kar liyā hai?*

Jawāb sāf hai. Ham us waqt mañzūr hoñge jab hamārā dil sachchā aur pāk ho. Ab āp mujhe batāie:

- *Kis ke dil meñ jhūṭh kī jhalak bhī nahīn hai? Kaun sarāsar sachchā hai? Ḳhulūsdil hai? Kyā aisā koī insān hai?*

Siwāe al-Masīh ke koī bhī nahīn.

- *To phir ham kis tarah mañzūr ho sakte hain?*

Mere Nek Kām Mujhe Bachā Nahīn Sakte

Ek ām ḳhyāl yih hai ki qiyāmat ke din jab mere bure aur achchhe kāmōñ ko tolā jāegā to mujhe mañzūr kiyā jāegā. Islie ki achchhe kām zyādā bhārī nikleñ.

- *Mere dost, kyā qiyāmat kā din bāzār hogā jis meñ āṭe aur chīnī kī jagah mere gunāhoñ ko tolā jāegā?*

Aur agar aisā ho bhī saktā to mujhe batāo:

- *Āpko kis tarah pūrā yaqīn ā saktā hai ki āpke gunāhoñ ko māf kiyā jāegā?*

Nanhī bheṛ kī misāl lo.

► *Jab wuh sahī rāh se haṭkar gaṛhe meñ gir gaī to kyā wuh apnī achchhī harkatoñ se gaṛhe se nikal saktī thī? Pahle to wuh ṭhīk rāh par chaltī thī. Gaṛhe meñ girne ke bād kyā uskī pahlī achchhī harkatoñ ne gaṛhe se nikalne meñ uskī madad kī?*

Bilkul nahīn! Us waqt us ke achchhe kāmōñ kā koī fāyḍā na thā. Isī tarah qiyāmat ke din hamāre kāmōñ kā koī fāyḍā nahīn hogā. Gunāh kā gaṛhā to rahegā hī.

Yih kabhī nahīn ho saktā ki ham apnī hī tāqat se gunāh ke gaṛhe se nikalkar jannat meñ dākḥil ho jāeñ. Har sūrat meñ kisī aur kī zarūrat hai jo hameñ gaṛhe se khīnch nikāle. Jo hamāre gunāhoñ ke bāwujūd hameñ najāt de. Aur wuh hai hamārā Ḳhudāwand Īsā.

Koī Bhī Merī Sifārish Nahīn Kar Saktā

Aksar log kahte haiñ ki hāñ, qiyāmat ke din falāñ falāñ merī sifārish karegā. Falāñ nabī yā falāñ pīr mujhe bachāegā.

► *Mere dost, mujhe batāo ki kis tarah? Kyā ākhiri adālat is duniyā kī adālatoñ jaisī hogī?*

Be-shak yahāñ baṛe baṛe officeroñ ko āzād kiyā jātā hai jab un kī sifārish kī jātī hai. Yā koī chāy-pānī dekar bach jātā hai. Isī lie to is duniyā meñ hamārī jān dhokebāzoñ aur choroñ se nahīn chhūṭtī. Sifārish kī wajah se. Chāy-pānī kī wajah se. Har koī apnī ḡhalatiyāñ chhipāne kī koshish kartā hai. Har ek koī na koī jugāṛ nikāl letā hai tāki apnī ḡhalatiyoñ aur gunāhoñ se chimṭā rah sake.

► *Kyā jannat bhī duniyā jaisī hogī? Kyā wuh bhī choroñ, qātiloñ aur zinākāroñ se khachākhach bhārī parī rahegī? Kyā Ḳhudā kī kachahrī aisī hī ho saktī hai?*

Hargiz nahīn! Jo pāk aur muqaddas hai wuh kis tarah aise insānī jugāṛ mañzūr kar saktā hai? Wuh to pākīzagī kī jawālāmukhī hai. Us sholāzan āg ke sāmne har insān jo pūrī tarah pāk nahīn hai bhasm ho jātā hai. Allāh Ta'ālā yih kis tarah bardāsht kar saktā hai ki koī us se

kahe ki “Ai parwardigār, merā falān dost to barā chor aur badmāsh hai. Lekin use jāne de.”

Ḳhudā to chāhtā hai ki āp aur main usī kī tarah ban jāeñ. Ki ham usī kī tarah pāk aur muqaddas hoñ. Sifārish se ham pāk-sāf to nahīn ho jāeñge.

► *Yih kis tarah ho saktā hai ki ham apnī gandī hālat meñ jannat meñ dāḳhil ho jāeñ aur wahān yahān kī tarah ek dūsre ko satāte raheñ?*

Allāh Ta’ālā kā maqsad kahīn azīm hai. Uskī marzī yih hai ki ham tabdīl ho jāeñ. Ki ham pāk-sāf hokar hī jannat meñ dāḳhil ho jāeñ. Jannat to wuh jagah hai jahān na gunāh na gandagī pāī jātī, jahān dhoke, harām-kārī aur lālach kā nām-o-nishān tak nahīn hotā. Jahān yih chīzeñ pāī jātī haiñ wuh jannat nahīn balki jahannum kahlātā hai.

Wāhid Hal: Achchhā Charwāhā

Ek hī hal hai. Wuh jis ne farmāyā ki main achchhā charwāhā hūñ. Īsā Masīh ne achchhe charwāhe ke bāre meñ farmāyā,

Bheṛeṅ uskī āwāz suntī haiṅ. Wuh apnī har ek bheṛ kā nām lekar unheṅ bulātā aur bāhar le jātā hai. Apne pūre galle ko bāhar nikālne ke bād wuh un ke āge āge chalne lagtā hai aur bheṛeṅ us ke pīchhe pīchhe chal paṛtī haiṅ, kyoṅki wuh uskī āwāz pahchāntī haiṅ. ... achchhā charwāhā mainṅ hūṅ. Achchhā charwāhā apnī bheṛoṅ ke lie apnī jān detā hai (Yūhannā 10:3-4,11).

- *Kyā Ḳhudāwand Īsā Masīh hamārī sifārish karegā? Kyā wuh kahegā ki “Chalo koī nahīn, us ṭeṛhe-meṛhe dhokebāz ko jāne de”?*

Nahīn. Uskā duniyā meṅ āne kā aur maqsad thā. Wuh hameṅ bachāne āyā, magar uskā bachāne kā tariqā anokhā thā. Aisā tariqā jo sirf wuhī istemāl kar saktā thā.

Ḳhudāwand Īsā be-gunāh thā. Use mālūm thā ki insān apnī hī koshishoṅ se bach nahīn saktā. Hamāre achchhe kām hamāre bure kāmōṅ par ghālib nahīn ā sakte. Sifārish kā tariqā bhī nākām

rahegā. Ilāhī āg ke huzūr har gunāh kī sazā bhugatnī paṛegī.

Iskā ek hī hal thā: yih ki Ḳhudāwand Masīh hamāre gunāhoñ kī sazā Ḳhud bardāsht kare. Jo be-gunāh thā us ne apnī jān insān kī Ḳhātir dī. Us ne wuh kuchh kiya jis kī peshīngōī Yasāyāh Nabī ne bahut sadiyāñ pahle kī thī,

Us ne hamārī hī bīmāriyāñ uṭhā līñ, hamārā hī dukh bhugat liyā. To bhī ham samjhe ki yih uskī munāsib sazā hai, ki Allāh ne Ḳhud use mārkar Ḳhāk meñ milā diyā hai. Lekin use hamāre hī jarāym ke sabab se chhedā gayā, hamāre hī gunāhoñ kī Ḳhātir kuchlā gayā. Use sazā milī tāki hameñ salāmatī hāsīl ho, aur usī ke zaḲhmoñ se hameñ shafā milī. Ham sab bheṛ-bakriyoñ kī tarah āwārā phir rahe the, har ek ne apnī apnī rāh iḲhtiyār kī. Lekin Rab ne use ham sab ke qusūr kā nishānā banāyā.

Us par zulm huā, lekin us ne sab kuchh bardāsht kiyā aur apnā muñh na kholā, us bheṛ kī tarah jise zabah karne ke lie le jāte haiñ. Jis tarah lelā bāl katarne wāloñ ke sāmne ḳhāmosh rahtā hai usī tarah us ne apnā muñh na kholā. Use zulm aur adālat ke hāth se chhīn liyā gayā. Us ke daur ke log— kis ne dhyān diyā ki uskā zindoñ ke mulk se tālluq kaṭ gayā, ki wuh merī qaum ke jurm ke sabab se sazā kā nishānā ban gayā? Muqarrar yih huā ki uskī qabr be-dīnoñ ke pās ho, ki wuh marte waqt ek amīr ke pās dafnāyā jāe, go na us ne tashaddud kiyā, na us ke muñh meñ fareb thā. (Yasāyāh 53:4-9)

Na hamāre nek kām hameñ bachā sakte haiñ na koī sifārish karne wālā. Sirf aur sirf Ḳhudāwand Īsā Masīh hameñ najāt de saktā hai jis ne hamāre gunāhoñ ko apne ūpar uṭhākar miṭā diyā. Jab ham us achchhe charwāhe par īmān lākar us ke shāgird ban jāte haiñ tab hī hameñ pūrā yaqīn aur

pūrī tasallī miltī hai ki ham jannat meñ dākḥil ho jāenge.

Injil, Lūqā 15:4-7

Farz karo ki tum meñ se kisī kī sau bheṛeñ haiñ. Lekin ek gum ho jātī hai. Ab mālik kyā karegā? Kyā wuh bāqī 99 bheṛeñ khule maidān meñ chhoṛkar gumshudā bheṛ ko ḍhūṇḍne nahīñ jāegā? Zarūr jāegā, balki jab tak use wuh bheṛ mil na jāe wuh uskī talāsh meñ rahegā.

Phir wuh ḳhush hokar use apne kandhoñ par uṭhā legā. Yoñ chalte chalte wuh apne ghar pahuñch jāegā aur wahāñ apne dostoñ aur hamsāyoñ ko bulākar un se kahegā, ‘Mere sāth ḳhushī manāo! Kyonki mujhe apnī khoī huī bheṛ mil gaī hai.’ Maiñ tum ko batātā hūñ ki āsmān par bilkul isī tarah ḳhushī manāī jāegī jab ek hī gunāhgār taubā karegā.”